



UPA 2015/8  
10. marts 2014  
Peter Olsen

### **2014-imut ilassutitut aningaasaliissutissanut inatsisissatut siunnersuut** (Aningaasaqarnermut Aatsitassanullu)

2014-mut ilassutitut aningaasaliissutissanut inatsisissatut Aningaasaqarnermut Aatsitassaqaqarnermullu naalakkersuisup siunnersuutaanut Inuit Ataqatigiit matumuuna imaattumik oqaaseqaateqassaavut.

Aningaasaqarnermut aatsitassaqaqarnermullu naalakkersuisup siunnersuutaani ilanngussaq 1-mik ilanngussarlu 2-mik taagugaani atuarneqarsinnaavoq suliat 31-it Aningaasaqarnermut Ataatsimiisitaliamut suliarineqartussanngorlugit nassiunneqarsimasut, taakkunanngalu suliat 29-it akuersissutigineqarsimallutik, suliarlu ataaseq akuersissutigineqarsimanani. Suliassat nassiunneqarsimasut sinneri Aningaasaqarnermut Ataatsimiisitaliamit suliarineqarsimanngil-lat, qinersisoqartussanngorsimanera innersuussutigalugu.

Aammattaaq suliat arfinillit Naalakkersuisunit akuerineqarsimapput suliallu marluk Inatsisartut Suleriaasiannut Ataatsimiisitaliamit akuersissutigisimallutik. Kiisalu Inatsisartunut immikkut ittumik qinersinissaq pillugu Inatsisartut inatsisaat nr.12 Oktoberip aallaqqaataani 2014-immeersup akuersissutigineqarnerata kingunerisimavaa, aningaasaliissuteqartarnermut tunngatillugu kinguneqartitsinerit, tassaasut partiit qineqqusaarnerannut qinersinermullu aningaasartuutissanut tapiissutit.

Sulianit katilliugit 38-nit akuersissutigineqarsimasuniit suliat 33-it missingersuutitut sunniuteqarsimanngilat, sulialli tallimaasut IST-ip inerneranut sunniuteqarsimallutik. IST tassaalluni: Ingerlatsineq – Sanaartugassat – Taarsigassarsiallu.

Soorlu aamma naalakkersuisup oqaaseqaataani takuneqarsinnaasoq aningaasanut inatsimmi 2014-moortumi IST-mi sinneqartoorutissatut 46,5 mill.kr-nit missingiunneqarsimagaluar-put, (naak naalakkersuisup oqaaseqaatani kukkunikkut 46,6 mill.kr-nik amigartooruteqartus-satut allanneqarsimagaluartoq). Inatsisartut Aningaasaqarnermut Ataatsimiisitaliaata aamma inatsisartut Suleriaasiannut Ataatsimiisitaliap 2014-ip ingerlanerani ilassutitut aningaasaliis-sutit tallimat akuerai, tamaaliornikkullu IST-mi missingersuutitut amigartoorut 98 mill.kr-nik ajornerulersillugu.

Taamalilluni ilassutitut aningaasaliissutitut inatsisissatut siunnersuut ukiumut aningaasaqarfiusumut 2014-mut IST-mi 51.5 mill.kr-nik amigartooruteqarfiusussanngorluni.

Missingersuutitut ajornerulersutaasimasutut aningaasaqarnermut naalakkersuisup tunngavilersuutitut pingaarnertut taakkartorpaa suliaq nr. 14-662 "iluarsagassanik sanaartugassanillu suliassat siuartinneqarnerat, suliffissaaleqinerup annikillisinneqarnissaa siunertaralugu"

Naak suliaq taanna missingersuutitut annertuumik ajorseriarnermik kinguneqartitsigaluartoq Inuit Ataqatigiinniit tamanna apeqqusinngilarput, pissutigalugu suliffissaaleqinermik akiuniarluni iliuuserineqarsinnaasut suulluunniit tamaasa qujarullugit tigusariaqarigut Inuit Ataqatigiinniit pingaartillugu oqariartuutigerusupparput. Taamaakkaluartorli piffissaq manna iluatsillugu....,

IA-niit suliamut uunga tunngatillugu uparuaassuteqassalluta pinngitsoorusunngilavut.

Inuit Ataqatigiinniit isumaqarpugut suliaq nr. 14-662 pipallataavallaarlunilu pilersaarusionerlutaavallaartoq, pissutigalugu sanaartugassarpassuarnut tunngatillugu isumaginittussat; tassalu kommunit, pilersaarusionermi peqataatinneqanngippallaarsimapput; aningaasaliissutit ikerinnaannakkut pilersaarutaanngitsumillu aningaasaliissutigineqarsimanagerat pissutigalugu piffissap sivikitsuinnaap iluani pilersaarusiupallasinnaaneq ajornakusoorsimavoq, minnerunngutsumillu aningaasat atugassiissutigineqartut arriippallaamik kommuninut agguaaneqarsimanagerata aamma kingunerisimammamagu suliassat amerlasuut aallartinneq ajulerlutik, sivisuumik uninngaannartariaqarsimanagerat. Tamannalu torrallataanngitsutut, pilersaarusionerluagaanngitsutullu Inuit Ataqatigiinniit oqaatigerusupparput.

Neriunniarta siunissami taamatit pisoqaqqissanngitsoq.

Taamaattumik naggataatigut pissusissamisoorsorinarsinnaavoq apeqqutigissallutigu, aningaasarpassuit, aningaasaliissutigineqarsimasut taakku siunertaasimasoq naapertorlugu atorneqarsimangersut; Ilaatigut paaserusunnassagaluarpoq tusarusunnarlunilu; sanaartugassarpassuit tamarmik aallartinneqareersimangersut? Sumi qanorlu sanaartortoqarsimangersoq? Suut naammassineqareersimappat? Suullu suli naammassineqarsimanngillat?

Suliffissat praktikkerfissallu qassit pilersinneqarsimappat? Apeqqutit pineqartut arlaatigut akineqarsinnaasuuppata qujanassagaluarvigami. Pissangalluta qilanaarlutalu utaqqissavarput.

Taamatut oqaaseqaateqarluta, matumuna siunnersuut taamatut isikkoqartillugu, aappassaniigassanngorlugu Inuit Ataqatigiinniit akueraarput.